



LAMEPA

LOMIGA
MATI—APERILA
2022

EKALESIA FAAPOTOPOTOGA KERISIANO AMERIKA SAMOA

ALOFAAGA O LE ESETA — LAULAUFONO FONOTELE

ANOTUSI

Alofaaga o le Eseta — Laulaufono Fonotele	1
Faasilasilaga Fono Tele XXXIV, Iulai 2022	1
Ripoti o le Koviti-19 i Amerika Samoa	2
Lauga o le Eseta	3
Faauuau pea galuega faufale i totonu o le 'aai i Kanana Fou	4
Lu'itau o le Koviti-19: Suiga mo le Ekalesia ma le Galuega Tala'i	5
Ripoti Lucky Number	8
'Aufaigaluega agavaa e Tausi 'Aulotu	9

O le faamanatuina o le Aso Sa o le Eseta i lea tausaga ma lea tausaga, o le avanoa e manatunatu ai le 'au Kerisiano i mea o loo tutupu i le soifuaga e manaomia ai le mana o le toetu manumalo o le Atua, na faaalua mai i le toe soifua mai o Iesu mai le oti ma le tuugamau. A tatou vaavaai i mea o loo tutupu i lenei vaiata, e le taumate lo tatou moomia o le mana lea.

E tele pea vaipanoa o le lalolagi i nei aso o loo sasao ai le oti ma le tauaafefe o le tuugamau. E pei ona silafia, ua savali nei le tolu (3) tausaga o mafatia pea le lalolagi i faiga o le faama'i o le koviti-19. O lona tūgā ma lona mata'utia, ua manatu ai foma'i ma tagata atamamai o le soifua maloloina, o le faama'i pito sili lea ona mata'utia i



le tala faasolopito o le lalolagi. E ui ua faaititia le malosi o le faama'i i isi atunuu o le lalolagi, a o lea faatoa amata ona sasao i atumotu o le Pasefika, aemaise ai Samoa Tuto'atasi ma Amerika Samoa. Saoasao le alu i luga o le fainumera o tagata o le atunuu ua aafia. Ua faamaonia foi tagata o le atunuu ua maliliu ona o le faama'i. Ua lagona ai le fefe ma le atuatuvaile i tagata.

I atunuu e mamao, e molimauina le sasao o le oti ma le tauaafefe o le tuugamau i faigamalo o loo fetaua'i ma tau-upu ona o le sailiga o le pule ma le malosi, e pei o Lusia ma lona sii taua i Ukraine, ma le vevesi pea o Saina, Korea i Matu, ma Amerika. O le taua i Ukraine ua maliliu ai le fia afe o tagata, ma nofo'esea ai le 5 miliona o tagata Ukraine i isi atunuu tua'oi. Ua 'au faatasi Amerika ma malo soofaatasi a Europa e faasala Lusia ona o lenei faiga lē alofa, e ala i le faia o ni fa'asā faale-tamaoia e aafia ana tupe maua mai i fefaatauaiga, ina ia afaina ai lana tupe faasoasoa. Peita'i, o lenei faiga e le gata e afaina ai na'o Lusia, a ua afaina ai foi ma tupe faasoasoa o le tele o isi atunuu o le lalolagi, e ala i le taugatā ma le siitia i luga o le tau o oloa ma le penisini.

E le faigofie le tulaga ua i ai nei lalolagi ma mea o loo tutupu ai, le faailoga o le malosi pea o le sasao o le oti ma le tauaafefe o le tuugamau. A o le feau faamanatu o le Aso Sa o le Eseta, e leai se mea e atuatuvaile ai ma faapoleina ai i tatou. Aisea? Auā ua uma ona faatoilalo e le Atua le oti ma le tuugamau, e ala i le toetu manumalo o Keriso i le taeao o le Eseta. O le manumalo o Keriso o lo tatou manumalo foi lea. O le mana foi o le Atua sa faaalua i lona taeao, ua faamanaina ai le 'au faatuatua uma ina ia 'aue ne'i tatou fefefe pe a sasao le oti ma faamata'u mai le tuugamau e ala i mea e tutupu i le soifuaga, aua o lo outou soifua ma lo tatou ola o loo i aao agalelei o le Atua o le Eseta. Ekalesia e, ia avefa pea le feau o le Eseta e fai ma fatu o la ta galuega tala'i. Ia manuia tele le EFKAS i lenei vaiata o le Eseta. Alofaaga,

Ta'ita'ifono & Laulauafono o le Fonotele EFKAS

Aperila 8, 2022 - Ua mae'a ona faailo ma faasalalau le faataunuina o le fonotele a le Ekalesia Aoa EFKAS ia Iulai 2022. I se faasilasilaga mai le Ofisa a le Failautusi Aoa o le Ekalesia, ua faailoa mai ai le finagalo 'autasi

**FONO
TELE
XXXIV
IULAI 10-22, 2022**

o le afioga i le Ta'ita'ifono ia Faateete Saifoloi FT ma le Laulauafono o le fonotele a le Ekalesia, o le a faataunuina le Fono Tele XXXIV a le EFKAS, ia Iulai 10-22, 2022. E pei o le fonotele i le tausaga ua mavae, o le Fono Tele XXXIV i lenei tausaga o le a faatino i luga o le upega tafailagi, ona o tulaga o le faama'i e pei ona pesia ai nei Amerika Samoa. Ua talosagaina Matagaluega i fafo e potopoto faa-Pulega e fesootai mai ai i le fonotele i luga o le upega tafailagi, e faapea foi i Pulega i Amerika Samoa nei pe afai e faateteleina pea le pipisi o le faama'i i le atunuu. E taua le Fono Tele XXXIV i lenei tausaga auā o le a see ai le Sui-Ta'ita'ifono e fai ma Ta'ita'ifono fou e pei ona aiaia e le Faavae o le Ekalesia, ae saili uma ai isi tofiga o le Ofisa o le Fono Tele e ala i le palota, e aofia ai le tofi Sui-Ta'ita'ifono, le Failautusi Aoa, ma le Teutupe. Sau se taimi ona toe faasilasila atu lea o nisi o tualumaga o le fonotele. Silasila ane ma siaki le itulau o le Ekalesia i luga o le upega tafailagi, <https://efkasonline.org>, o le a faasalalau atu ai isi faasilasilaga mo le mamalu o le Ekalesia.

RIPOTI O LE KOVITI-19 I AMERIKA SAMOA

O lenei tusitusiga, o le faaauuina lea o le tusitusiga a amata mai i le Lamepa ua mavae (Ianuari-Fepuari 2022), e ripotia ai le oo mai o le faama'i tūgā o le koviti-19 iinei i Amerika Samoa. Faai'u le tusitusiga taluai i le faailo a le Malo o Amerika Samoa na faasilasila mai i le aso 22 o Fepuari 2022, i le faamaonia o le pipisi o le faama'i koviti-19 i tua i nuu ma afioaga. I le taimi o lenei tusitusiga (Aperila 22, 2022), ua atoa ai nei le 2 masina talu ona aafia Amerika Samoa i le koviti-19. O se tala otooto lenei i le aafia ai o le atunuu, faatasi ai ma le aafia o le Ekalesia iinei i Amerika Samoa.

E tusa ai ma faamamauga a le Matagaluega o le Soifua Maloloina a le Malo o Amerika Samoa i le taimi o lenei tusitusiga, ua 5,724 tagata ua faamaonia ua aafia i le koviti-19, ae 24 tagata ua maliliu. Mai le 5,724 ua aafia, e 5,253 ua toe malolosi, ae totoe ai le 471 tagata o loo aafia pea i le faama'i. E tusa ai ma ia fainumera i le taimi o lenei tusitusiga, e molimauina ua amata ona fai ifo le numera o tagata aafia. Ae sa le faapea i le amataga.

O le masina o Mati na faatetele ai ma saosaoa ai le pipisi o le faama'i. I le amataga o Mati sa ta'i-10 i le ta'i-15 tagata fou e maua i le aso ua aafia i le koviti. A o le aso 14 o Mati, i le atoa ai o le 3 vaiaso talu ona faailoa le pipisi o le faama'i i Amerika Samoa, na oso ai i luga le fainumera o tagata fou ua aafia i lea aso, e 163. O Mati 17, 183 tagata fou na aafia ai. O Mati 22, e atoa i ai le masani talu ona pipisi le faama'i i Amerika Samoa, 258 tagata fou sa faamaonia ua maua i lea aso i le koviti. E tagata silia le aso 28 o Mati, e 326 tagata fou sa maua ai ua aafia i le koviti. O nuu tetele e pei o Tafuna, Nuuli ma Leone sa ripotia mai ai le to'atele o tagata ua aafia i le faama'i. I le taimi o lenei tusitusiga, ua soo uma nuu i Tutuila ma le tagata ua aafia i le faama'i. Ae toe o Manu'a e lei oo i ai le faama'i, ma o loo galulue malosi le Malo ma le Matagaluega o le Soifua Maloloina, ina ia taofia le oo o le faama'i i Manu'a.

O se tala faatupu faamoemoe le oo mai i le masina o Aperila, ua amata ona fai ifo i lalo le numera o tagata aafia. O lona uiga, e tasi lava le masina (Mati) na alu ai i luga o le fainumera, ae toe pa'u mai i lalo. E le pei o isi atunuu tetele, e fia masina o alualu i luga le fainumera, e atoa lelei le tausaga, faatoa vaaia lea o le pa'u i lalo. E mafai ona faapea, o le toaitititi o le faitau aofa'i o tagata i Amerika Samoa pe a faatusatusa i isi atunuu ua vave ai ona pa'u le fainumera o tagata aafia. Peita'i, e i ai le manatu, o le to'atele o tagata i Amerika Samoa ua faia tui puipua, faatasi ai usisitai o tagata i faatonuga ma lapataiga mo le nofo puipua e pei ona faamalosi e le Malo, ua mafua ai ona vave sau i lalo le fainumera o tagata aafia.

Aafiaga i le Ekalesia: I le taimi na faia ai lenei tusitusiga (Aperila 22, 2022), o loo tapunia pea malumalu tapua'i ona o puipua mai le faama'i. Ua atoa ai nei le 2 masina talu ona tapunia ma le toe faia ni sauniga lotu. Ina

ua molimauina le fai ifo o le numera o tagata aafia i lenei masina o Aperila, na aumai ai e le Malo le avanoa e toe tatala ai malumalu tapua'i, ina ua faataga mai le to'a-10 tagata i totonu o fale ma nofoaga faitele. Peita'i, o le silasila a le Ta'ita'ifono ma le Laulauafono, faatasi ai ma le Laulau a le Komiti a Tamā o le Ekalesia, sa faateete ne'i vave tatala mamalu tapua'i ae fai ma ala e toe oso ai luga le fainumera o tagata aafia. O le ala lea na faatonu ai pea le tapunia o malumalu tapua'i o le EFKAS, se'i matau pea āluga o le faama'i ma le aafia ai o le atunuu.

E ui i le tapunia o malumalu, ae sa faasilasila mai e le Laulau a Tamā o le Ekalesia le vaiaso o le anapogi ma le tatalo mo Amerika Samoa, na amata mai i le 13 o Mati e oo atu i le aso 20. O le Aso Sa foi o le Eseta, le aso 17 o Aperila, na faatonu e fai ma Aso Tatalo mo Amerika Samoa ona o le faama'i, e tali ai le augani mai o le Kovana Sili o Amerika Samoa i Ekalesia i le faamanatuina o le Eseta.

O se tala mai i galuega a le Ekalesia, o le aso lava lea na faailoa mai ai le pipisi o le faama'i i tua i nuu ma afioaga (Fepuari 22), na tapunia ai foi le Ofisa Tutotonu, le Seminare Faafaifeau i Kanana Fou, faapea le Aoga Tulaga Muamua ma le Aoga Mauuluga o le Ekalesia. O Mati 15, i le atoa ai o le 3 vaiaso talu ona pipisi le faama'i, na toe tatala ai le Ofisa Tutotonu. Na auai mai le 'aufaigaluega e faatino a latou galuega masani. Sa faaitiitia itula faigaluega ona o puipua mai le faama'i. A o le vaega o le Lamepa ma le Ofisa o Aoaoga Kerisiano, sa faatonu e faatino mai a latou galuega i tua i aiga. E ui i le faaitiitia o itula faigaluega, ae sa atoa pea le totogi o tagata faigaluega e pei ona masani ai.

O le Seminare Faafaifeau i Kanana Fou, le Aoga Tulaga Muamua ma le Aoga Mauuluga, e lei nofoa'i ina ua faailoa mai le pipisi o le faama'i, ae sa faatino lo latou a'oa'o atu i luga o le uepaga tafailagi. O le galuega tele foi o loo feagai nei ma le Susuga i le Peresetene ma le Aiga o Faiaoga, aemaise o A'oa'o o le Laumua, o le leoleoina faasoloatoa o le 'aai i Kanana Fou. Amata mai lava i le taimi na mua'i faailoa mai ai le pipisi o le faama'i e oo mai i le taimi o lenei tusitusiga, o loo faatino pea e le Laumua lenei galuega lelei, e le gata mo le puipua o le 'aai mai le oo mai i totonu o le faama'i, a o le puipua foi o mea totino a le Ekalesia. E momoli atu ai le faafetai tele i le Susuga i le Peresetene ma le Laumua.

Ua finagalo nei le Laulauafono e faataunuu le fonotele i lenei tausaga, ina ua molimauina le fai ifo i lalo o le numera o tagata aafia. Ua maua foi tala mai le Malo, a tumau ai pea i lalo le fainumera, o le a faailoa mai i se taimi le toe faatagaina o sauniga lotu i malumalu tapuai, faatasi ai ma le tatala o alavaa e mafai ai ona 'auai mai usufono i fafo i le fonotele. Tatou tuu pea i le Atua lenei faamoemoe, ia faatunuuina I lona alofa pe a tusa ai ma lona finagalo.

O se tala otooto lea o le oo mai o le koviti-19 iinei i Amerika Samoa. Tatalo pea i le Atua ina ia tumau ai pea i lalo le fainumera o tagata aafia, ma ia oo atu lava i le tulaga e tafi'esea ai le koviti-19 mai le atunuu. O le Lamepa e sosoo ai o le a taumafai e toe faaauu ai lenei tusitusiga (Me-Iuni), mo le silafia e le mamalu o le Ekalesia.



LAUGA



...Aso Sa o le Eseta

Tusi Faitau—Mataio 28:1-15

Matua—f.10: “‘Aua lua te matata’u, ina o atu ia, lua te ta’u atu i o’u soo, ina ia latou o atu i Kalilaia, latou te iloa ai a’u.”

E ui na tapunia malumalu tapua’i ma vavao tapuaiga faitele ona o le puipuiga mai le fa’ama’i oti o loo pesia ai nei le atunuu, e talitonu le manatu, e le o moenoa lo outou silafia ma lo tatou iloa i le ta’ua o lenei Aso Sa. O le Aso Sa o le Eseta. O le Aso Sa o le Toetu. O le taeao na toilalo ai le oti. Le taeao na tu’ufua ai le tuugamau, ina ua toetu manumalo lo tatou Alii o Iesu Keriso.

O le fatu lea o le Tala Lelei. O le tumutumuga lea o le faaolataga na saunia e le Atua. Le faaolataga na amata i tiga ma puapuga o le Aso Faraiile ua mavae. Na amata i le inosia ma le tuulafoaiina. Amata i le satauro matagā ma le matuitui o le oti. A o le asō, o lea ua tauluga i le manumalo. O le asō ua taunuu ai i le fa’aeaina, ina ua fulieseina le ma’a sa i le tuugamau ma alaga le agelu, “*E le o iinei o ia, auā ua toetu mai o ia. O mai, inā matamata i le mea na tu’u ai o ia.*” O le autu lea o le Aso Sa o le Eseta.

Peita’i, ua tatou fa’amanatuina le Eseta i lenei tausaga i le taimi tonu o loo vāvāō ai le atunuu i le fa’ama’i oti o le koviti. Pei ona silafia, to’atele le atunuu ua aafia ai. Ua foi nisi ua maliliu ai. Ua oia le gasologa o le soifuaga sa tatou masani ai. Ua sosolo fa’aafi lagona o le fefe ma le atuatuva-le. Ua saisaitia ma taotaomia le to’atele, ona o tulafono mo le nofo puipua. Ua lē mautonu ai fa’aiuga fai.

E leai se eseesea o lagona ia ua sosolo fa’aafi nei, ma lagona sa lualuga i le ‘ausoo i le Aso Faraiile na maliu ai le Alii i luga o le satauro. Le faitaga’i ma le fevaevaea’i. Le matata’u ma le atuatuva-le. Le faamoemoe ua mate ma le faatuatua ua liu suavai. Ua leiloa e le ‘ausoo poo le a le mea a fai – sosola loa ma lalafi, ona o le fiaola ma le fefefe i le oti. Ae ina ua tatafa ata o le taeao o le Eseta, o iina na suia ai le fefe ma le atuatuva-le i le fiafia ma le olioli. Suia le faitaga’i ma le fevaevaea’i i le loto gatasi ma le galulue faatasi. Le faamoemoe sa mate, ae suia i le faamoemoe fou o le ola.

O fa’ailo ia o le Atua galue. E galue le Atua e fa’atupu le ola mai le mea o loo i ai le oti. E gaoioi le Atua e fa’amaita le manumalo mai le mea o loo iai le toilalo. O le fefe ma le atuatuva-le sa lualuga ai le Aso Faraiile ua mavae, e le o le fa’aiuga lea o le tala. O le maliu tiga o Iesu i luga o le satauro ma le taapeape o lona ‘ausoo, e le o le tauluga lea o le ata. A o le asō, lea ua tatou maua ai le faai’uga sa’o o le tala, e faai’u i le ola. O le asō ua tatou maimoa ai i le tauluga mo’i o le ata, e tauluga i le manumalo.

O fea la e galue ai le Atua, e i’u lava i le ola. Soo se lotoifale lava e gaoioi ai le Atua, e tauluga lava i le manumalo. Ma, o le fa’amanatu lea o le Eseta mo i tatou. A o

faamalumalu mai pea le fa’ama’i oti, ia manatua, e i ai pea le fefe ma le atuatuva-le. E tupu pea le fevaevaea’i ma le faitaga’i. E i ai pea le maliu ma le oti. A o le faamanatu o le Eseta, o loo galue le Atua. O le feau o le Eseta, o loo gaoioi le Atua i totonu o le lotoifale o loo ola ma soifua ai lana fanau. Poo a la fita ma faigata e feagai ma i tatou, soo se mea lava o galue ma gaoioi ai le Atua, e i’u lava i le ola, ma tauluga i le manumalo.

E i ai le ta mataifaioi. E i ai la ta pito laau, e pei ona ta’ua i le tusi faitau o lenei aso. O le feau o le Eseta, e le o se feau na aumai ona nofonono lea ma le ‘au faalogologo. E le o se feau na aumai e teuteu faalelei e i latou sa faalogologo i ai. A o le feau o le Eseta, o le feau na aumai e ta’u atu. O le feau na aumai ina ia molimau atu. O le faatonuga lea a le agelu i fafine na ala usu i le taeao ma latou feiloai i le tuugamau a Iesu. A o lea foi ua fa’alua e le Alii Toetu, i upu ia ua ave ma a tatou matua, “*Aua lua te matatau, inā o atu ia, lua te ta’u atu i o’u soo, ina ia latou o atu i Kalilaia, latou te iloa ai a’u.*” Ta’u atu. Molimau atu. E le na o le faaleo i upu ma tala. A o le molimau e sili ona aanoa, o le ola ai. O au galuega e fa’atino. O au fa’ai’uga e fai. O lau amio e te ola ai—o ‘auala ia e ta’u atu ai ma molimau atu ai le toetu o le Alii.

E i ai le lu’itau lea e aumai e le Evagelia o Mataio i le faatinoga o le ta pito laau lea. E tofu lava le ‘au faievagelia ma lana ia molimau o mea sa tutupu i le taeao o le Eseta. Ae na’o Mataio lava, o loo ta’ua ai le ‘au leoleo lea sa leoleoina le tuugamau. Le ‘au leoleo lea faimai sa tetemū ma mata-tata’u, ina ua tō le mafui’e, ma fulieseina le ma’a tele sa pupuni ai le gutu o le tuugamau.

Fai mai na o le ‘au leoleo ma logo atu i ositaulaga sili, le mata’utia o mea sa latou molimauina i le toetu o le Alii. Ae fa’asaga ane le ‘au ositaulaga sili, ma totogi i tupe le ‘au leoleo e o le fa’atupu le tala sese, sa o mai ona so’o i le po ma ave fa’agaioi le tino o Iesu mai le tu’ugamau.

Mafua la ona aumai e Mataio le tala lea i le ‘au leoleo, e fa’ailoa mai ai e lua molimau eseese sa tula’i mai i le taeao o le Eseta – o le molimau a fafine sa o ma ta’u atu le tala sa’o i le toetu o le Alii; ma le molimau a le ‘au leoleo sa fa’atauaina i tupe, e o le fa’atupu le tala sese ma le tala taulaaleaga. O fea la o tala ia e lua o le toetu o le Alii o ē molimau ai? O ē molimau i le tala sa’o sa ta’u atu e fafine? Poo e molimau i le tala sese ma le tala taulaaleaga sa talaiina e le ‘au leoleo?

Toatele le ‘au Kerisiano i nei ona aso, ua pei o le ‘au leoleo – ua faatauaina lo latou molimau i le tupe ma le naunau i le tamaoaga. To’atele ua faatauaina i le potu ma le atamai fa’ane’i ona po ma le naunau i le fia pule ma le fia sili. Fiafia e ta’uta’u le toetu o le Alii, ae matua mamao lava ma le mea lae ola ai.

Ioe, o le feau a ia o le Eseta, o le feau e tatau ona ta’u atu – o le feau e tatau ona molimau atu. Ma e leai a se molimau e sili ona aanoa, nai lo le olaina. Ia olaina le feau o le Eseta. Ia atagia i lou soifua le toetu o Iesu. E faapefea ona atagia? E faapefea ona olaina? Ae faapefea foi ona iloa poo e ola i le tala sa’o poo le tala sese. e uiga i le toetu o le Alii? E iloa i au galuega fa’atino – e iloa i au fa’aiuga e fai – e iloa foi i le

amio e te ola ai. Afai o au galuega faatino na te faama'itea le ola mo isi, o lona uiga, o le tala sa'o lona o loo e soifua ma molimau ai. Ae ffai o au faaiuga fai e manuia ai na'o oe ae ola faalolo ai le toatele, o lona uiga, ua faatauina lou molmau i tupe ma le tuinanau i le tamaoai. Afai o lau amio na'o le tupu ai o le vevesi ma le fetau'i, o lona uiga, e matua sese lava le tala lona o loo e soifua ma molimau ai.

Ioe, o galuega faatino e faamaite ai le ola. O faaiuga e faasalafa atu ai le ola mo isi, ma le amio e faatupu ola ma faatupu ai le Filemu, o mea ia e iloa ai le tagata o loo molimau i le tala sa'o, ma, o loo ola ma soifua i le toetu o le Alii. Samoa e, ia faapea ona tatou ola ai. Ona o Iesu, Amene!

FAAAUUAU PEA GALUEGA FAU FALE I TOTONU O LE 'AAI I KANANA FOU

Sa ripoti atu i le Lamepa taluai le galuega o le toe faafouina o le Fale Taalo "Taeaoafua o Tupulaga" o loo faia nei i totonu o le 'aai o le Ekalesia i Kanana Fou. O leni galuega ua mafai ona faatino ona o se alaga tupe mai le Malo Tele sa galulue ai le Komiti o Aoga ma le Komiti o Feau Eseese e faamautuina. Peita'i, e le pau lea o le galuega o loo galuea'ina nei i totonu o le 'aai o Kanana Fou. O nisi o galuega o loo faia nei e aofia ai le fale fou o le Pulega a Santa Clara, fale fou o le Pulega a Tualauta ma Leasina, fale fou o le Pulega a Itu'au, ma le faafouina o le Fale Taalo a le Aoga Tulaga Muamua a le Mafutaga Aoa a Tina.

O se vaaiga uiga ese le tele o galuega faufale o loo galuea'ina i le taimi e tasi i totonu o le 'aai o le Ekalesia. Na gata lava i le amataga i le taimi na fou ai le 'aai o Kanana Fou, ona vaaia le tele o galuega o loo faia i le taimi e tasi. Sala ai foi, aua ua atoa nei le 42 tausaga o le Ekalesia, ma, o le tele o fale i totonu o le 'aai ua sili atu ma le 30 tausaga talu ona fausia. Masalo o le mafuaaga lea o le tele o galuega o loo faia nei, ua lava I le taimi ua manaomia ona toe faafou ai le tele o fale o I totonu o le 'aai.



O se vaaiga lea i le fale fou a le Pulega Santa Clara. O leni fale sa amata ona fauina ina ua mae'a le fonotele i le 2018. Ua leva ona tatau na mae'a, peita'i, ona o le tulaga o le faama'i o le koviti sa pipisi i le 2020 ma le faataunuuna ai le fonotele i lona tausaga, sa faateletelegese ai le pulega i le faamae'aina o le galuega. O le fonotele ia Iulai 2022 poo le

fono a Komiti Tumau ia Ianuari 2023, ua faamoemoe le Pulega Santa Clara e umusa ai le fale.



O se vaaiga lea i le fale o le Pulega a Tualauta ma Leasina, e i autafa ane o le fale a Santa Clara. O Tesema 2021 na amata ai le galuega a le pulega, ma o le faamoemoe, o le masina o Me 2022 e tatau ona mae'a ai. O le Susuga i le Feagaiga ia Reupena Alo o le sui o le pulega o loo feagai ma le vaaiga o le galuega.



O se vaaiga lea i le fale fou a le Pulega a Ituau ua amata ona fausia. Ina ua vaelua le Pulega a Ituau ma Tafa o Kanana Fou sa tuu i ai le fale tuai, o le fonotele 2021 sa faasino ai e le Komiti o Feau Eseese le tulaga e fau ai le fale fou, i talamai o le fale o le Pulega a Aukilani, ae luma mai o le Fale Taalo "Taeaoafua o Tupulaga," e pei ona vaaia i le ata o loo tu mai tua. O loo faamoemoe le pulega ia mae'a le fale ma faaogaina i le taimi o le fonotele ia Iulai 2022.



O se vaaiga lea i le fale taalo fou a le Aoga Tulaga Muamua a le Mafutaga Aoa a Tina, o loo fau i luma ane o faleaoga i le tulaga sa i ai le malae taalo tuai. O leni faamoemoe, o loo faatupeina e le Mafutaga, faatasi ai ma le fesoaosani o alaga tupe mai le Malo Tele. O leni fale taalo o le a fausia lona falealuga, e malu ai tamaiti mai le tau.

LU'ITAU O LE KOVITI-19: SUIGA MO LE EKALLESIA MA LANA GALUEGA TALA'I

Folamua:

O le aafia ai o le lalolagi i le faama'i o le koviti-19, ua oia ai le soifuaga sa tatou masani ai. I le taimi o lenei tusitusiga, ua faaitiitia le pipisi o le faama'i i le tele o isi atunuu o le lalolagi. A o le Pasefika, aemaise ai le atu Samoa, o lea faatoa amata ona pipisi ai lenei faama'i faigata.

E le fesiligia le tele o lu'itau o loo aumaia e le koviti e tatau ona tatou mafaufau loloto i ai, aemaise o tulaga o le soifuaga ua tatou masani ai. Auā e pei ona faailoa mai e le 'au saianisi ma le 'au su'esu'e o le soifua maloloina, e le toe te'a ese le koviti ma i tatou. E avea le koviti ma mea tumau o le soifuaga i aso faisoo, ma e tatau i tagata uma ona faamasani e soifua faatasi ma le faama'i. Afai o lea, o lona uiga ua tatau ona toe fetuunai le soifuaga sa tatou masani ai. I le aganuu, i tu ma aga i totonu o aiga, i totonu o nuu, i atunuu ma faigamalo, aemaise le Ekalesia—e manaomia ona fai ni suiga talafeagai i le soifuaga sa tatou masani ai, ina ia mafai ona tatou ola faatasi ma le koviti, e le gata i le taimi nei, ae faapea le aga'i atu i le lumanai.

O lenei tusitusiga, e taula'i i suiga e manaomia ona fai e le Ekalesia. O le faavae lava ia o le Ekalesia i le tala'iina o le talalelei ma le misiona a le Atua ua valaauina e faataunuu, o mea ia e le suia, e tumau pea. A o le itu e tatau ona silasila toto'a ai le Ekalesia, o faiga o loo faaogaina i lona galuega tala'i e faatino ai—e pei o lona tapuaiga ma sauniga lotu, o lona mataupu silisili, o ana galuega faamisiona, o lona puleaga, ma isi. O a ni suiga e mafai ona fai e le Ekalesia i le itu o le faatinoina o lona galuega tala'i, e tapena ma saunia ai mo le ola faatasi ma le koviti-19?

E le oo se faamatalaga a lenei tusitusiga poo a tonu ni suiga e manaomia ona fai e le Ekalesia i lona galuega tala'i. O loo i ai le tofa paia i Tamā o le Ekalesia ma le 'aufaigaluega galulue i tua i afioaga ma 'aulotu, e sili atu lo latou silafia o tulaga ia. A o le fesili e fia tulituliloa, a o se fesili foi o loo laualuga pea i mafaufau o tagatalotu, "O se mea tatau ea le faia o ni suiga i le Ekalesia?"

E taofi eseese le to'atele. A o le si'uleo e masani ona faalogoina, e tatau lava ona tumau le Ekalesia i mea na sau a'i; e mamalu foi le Ekalesia i mea sa masani ai mai le amata. Peita'i, soo se taimi e tula'i mai ai se tulaga fou e aafia ai le ola ma le soifua o tagatalotu, e tatau i le Ekalesia ona toe silasila i lona galuega tala'i ma faiga o loo faaogaina e faatino ai, poo mafai ona faataunuu le misiona a le Atua ma pa'i le feau o le talalelei o loo tala'iina i tagatalotu e tusa ai ma le tulaga fou o loo aafia ai lo latou ola. Auā e ese'ese vaitau. E le tutusa foi tulaga e ola ma soifua ai tagata o lea tupulaga ma lea tupulaga.

O le tula'i mai o le koviti-19 ma le aafia ai o le soifua o tagatalotu i nei ona aso, o le faailo lea mo le Ekalesia, ua oo i le taimi ua tatau ai ona toe taga'i i lona galuega tala'i. O

mafi e le Ekalesia, i lona galuega tala'i ma faiga ua masani ai, ona faataunuu le misiona a le Atua ma tala'i le talalelei i tagatalotu o loo aafia lo latou ola i le koviti?" Afai e leai, o taimi ia e tāua ai suiga mo le Ekalesia ma lona galuega tala'i. E le o se mea fou le fai o suiga mo le galuega tala'i o le Ekalesia, auā e o' lava i le Alii o Iesu Keriso ma le Aposetolo o Paulo, ua la fa'amamafaina le tāua o suiga i le galuega tala'i sa feagai ma i la'ua.

Mau mai le Tusi Paia mo le tāua o suiga:

1. Uaina fou i Fagu-pa'u tuai (Luka 5:37-39)

I lenei faataoto e pei ona aumaia e Luka, o loo atagia ai le naunau o Iesu i suiga ma le toe fuata'iina o faiga sa masani ai le lotu o Iutaia i lona tapuaiga ma lona fa'amamafa i le soifua fa'aleagaga o tagata. Sa faitiaina le galuega a Iesu e le 'au faresaio ma le 'au tuisupu ona ua maitauina lona lē talafeagai ma faiga ma talitonuga sa masani ai le lotu o Iutaia. O le ata lea o loo aumaia e Luka i le tu'ufa'atasia o tala o loo fa'amaumauina i le mataupu e 5: le pa'i atu o Iesu i le lepela (ff.12-16), le fa'amaloloina o le pipili e ala i le fa'amagaloina o ana agasala (ff.17-26), o le talisuga ma tagata ao lafoga (ff.27-32), ma le tete'e o so'o a Iesu i le anapogi (ff. 33-35). O tulaga uma ia na mafua ai ona faitio le 'au faresaio ma le 'au tuisupu i le galuega tala'i a le Alii, auā e le talafeagai ma faiga masani sa sau a'i le lotu o Iutaia. A o ia faitioga, na tali e Iesu i le faataoto i le "Uaina fou i Fagu-pa'u tuai."

O lo'o atagia i lenei faataoto le tete'e o Iesu i faiga masani (traditions) a le lotu o Iutaia o loo tausi e le 'au faresaio ma le 'au tuisupu. O ia faiga o loo fa'amamafaina ai le itu i fafo o le fa'atuatua (outward expression of faith), e ala i le fa'atinoga o galuega o le tulafono. A o le tulaga sa naunau ai Iesu ma fa'amamafa i lona tala'iga, o le fa'atuatua e pogai mai i totonu (inward expression of faith), auā o iina e fa'avae ai le ituaiga soifua fa'aleagaga o loo finagalo ai le Atua mo ona tagata.

Fia selau tausaga o fai ma masani o tagata Iutaia le fa'atinoga o galuega o le tulafono. Na amata mai i le taimi sa foi ai le tafeaga mai Papelonia, e o'o mai lava i le vaitaimi o Iesu—ua silia ma le 400 tausaga o faamamafa e tagata Iutaia galuega o le tulafono e ta'utino ai lo latou ola faatuatua i le Atua! Silafia e Iesu, ua le toe talafeagai ia faiga ma le tulaga sa ola ma soifua ai tagata o lona vaitaimi. O le soifua fa'aleagaga o loo finagalo ai le Atua mo ona tagata, e amata i le fa'atuatua e sau mai i totonu o le lotu, a e le o le faatuatua i le itu i fafo.

"E leai foi se tasi na te utufia le uaina fou i fagu pa'u tuai; a fa'apea, ona pa ai lea o fagu pa'u i le uaina fou, ona masa'a ai lea, e maumau foi fagu pa'u" (f.37). E fou le feau sa tala'iina e le Alii, lea ua fa'atusaina i le "uaina fou." A o faiga masani o le lotu a Iutaia, ua fa'atusaina i "fagu pa'u tuai." E le mafai ona utufia le "uaina fou" i "fagu pa'u tuai." O lona uiga, e le talafeagai le feau fou o loo tala'iina e Iesu ma faiga masani sa taofiofi ai le lotu o Iutaia. A le mafai e le lotu o Iutaia ona fuata'iina ma fa'afou a latou

faiga o loo faaaogaina e faatino ai le ola fa'atuatua i le Atua, e leai se fa'aolataga mo i latou i le feau fou o loo tala'iina e le Alii. A aunoa ma ni suiga fou, o le mea e tupu e "pa le fagu pa'u tuai ma masa'a le uaina fou," ona maumau ai lea o mea uma e lua.

"Ae peita'i e utufia le uaina fou i fagu pa'u fou" (f.38).

E le aoga le fagu pa'u tuai mo le faiga o le uaina fou. Auā a faamafu le uaina, e fefete ma lautele le fagu pa'u. A uma ona faaaoga le fagu pa'u, e le toe aoga e faamafu ai se isi uaina fou auā e le mafai e le fagu pa'u ona toe fefete ma lautele. E mana'omia se fagu pa'u fou mo le uaina fou. O lona uiga, e mana'omia ni isi faiga fou ma ni isi auala fou e fa'atino ai le feau fou o loo tala'iina e Iesu. Ua le toe aoga faiga tuai a le lotu o Iutaia, auā e le mafai ona toe "fefete" ma toe "lautele." O lona uiga, ua uma taimi sa talafeagai ai ia faiga ma le tulaga sa ola ma soifua ai tagata. Ua fou le tulaga o lo'o ola ma soifua ai tagata. E mana'omia la ni isi faiga ma auala fou e tala'i ai le finagalo alofa o le Atua, ina ia feso'ota'i ma talafeagai ma le tulaga fou lea ua ola ma soifua ai tagata. O le autu lea o lo'o fa'atautu i ai le feau fou lea sa tala'iina e le Alii.

"E leai foi se tagata e inu i le uaina tuai, ona mana'oa loa lea i le uaina fou; auā ua fai mai o ia, ua lelei le uaina tuai" (f.39). Fa'a'ailoa mai e Iesu le faigata ona talia e le lotu o Iutaia o ni suiga fou. Soo se tagata lava e taofiofi mau i faiga sa sau a'i (traditions), e faigata lava ona ofi i lona mafaufau le tāua o le faatinoga o ni suiga fou. I lona manatu, o loo lelei lava le tulaga sa sau a'i, ma e leai se mafua'aga e ala ai ona sui. Silia ma le 400 tausaga o taumafa le lotu o Iutaia i le "uaina tuai." O le uaina ua manatu le lotu o Iutaia, e lelei. Afai o lea, e leai se mea o le a mana'omia ai fua se "uaina fou." Ae peita'i, o le "uaina tuai" lea o lo'o oti ai le soifua fa'aleagaga o tagata, auā ua le toe talafeagai le "uaina tuai" ma le tulaga fou o lo'o ola ma soifua ai tagata. E mana'omia e tagata le "uaina fou" – le "uaina fou" lea sa tala'iina e le Alii.

2. Afai o ia Keriso se tasi, o le tagata fou ia; ua mavae le ola tuai, faauta, ua o'o mai le ola fou! (2 Kori 5:11-21)

E pei ona atagia i le tele o ana tusitusiga e maua i le feagaiga fou, o le fa'afitauli tele sa feagai ma le Aposetolo o Paulo i lana galuega tala'i, o tala'iga ma a'oa'oga tau fa'a-sese a le 'au Iutaia-Kerisiano (Judaizers) sa afaina ai ekalesia sa tala'i ai le aposetolo. E lua autu sa faamamafa i le tala'iga a le 'au Iutaia-Kerisiano lea: o le fa'alēaogaina o le tulaga fa'a-aposetolo o Paulo, ma le fa'amamafaina o le tāua o le tulafono i le feau o le talalelei. O tulaga ia o loo fa'atautu ai le tele o tusitusiaga a le Aposetolo o Paulo e pei ona fa'amaumauina i le feagaiga fou. Ina ia fo'ia ia tala'iga tau fa'asese, sa masani le aposetolo i ana tusitusiga ona fa'amaonia muamua lona tulaga fa'a-aposetolo, fa'amalamalama le feau o le talalelei i le maliu ma le toetu o Keriso o loo fai ma autu o lana tala'iga, ma fa'amalosi 'au i le 'au kerisiano ina ia tumau i lana tala'iga ma ana a'oa'oga. O tulaga uma ia o loo atagia i le 2 Korinoto 5:11-21.

Sa i ai nisi o le 'au kerisiano i Korinoto sa taliaina a'o-

a'oga sese a le 'au Iutaia-Kerisiano sa ofi mai i le ekalesia. Ua latou fesiligia ai le tulaga fa'a-aposetolo o Paulo, atoa ai ma le natura o le talalelei sa fa'aautu i ai lana tala'iga. O latou ia o loo fa'atautu i ai lenei mataupu, amata i le ff.11-13:

11 O lenei, ona ua matou iloa le mata'u i le Alii, ua matou pulunaunau atu ai i tagata; ua silafia o matou olaga e le Atua, o la'u taofi foi ua iloa i matou i o outou loto fuatia ifo. 12 Auā e le toe ta'uleleia matou e i matou ia te outou, a ua matou avatu ia te outou se mea tou te mitamita ai ona o i matou, ina ia ia te outou se mea e fai atu ai i ē o mitamita i mea e vaaiā, a e le o le loto. 13 Auā pe afai ua matou vālea, ona o le Atua lea; pe afai ua matou atamamai, ona o outou lea.

I ia fuaiupu e tolu, e fa'a-sefulu ona fa'aaoga e le aposetolo le upu "matou," e fa'atautu lea ia Paulo ma le 'au kerisiano i Korinoto o loo tumau pea i lana tala'iga. A e fa'a-lima ona fa'aaoga le upu "outou," e fa'atautu lea i le 'au kerisiano i Korinoto sa tosina atu i a'oa'oga a le 'au Iutaia-Kerisiano. O le fefo'ifo'ia'i o Paulo i le fa'aaogaina o le "matou" ma le "outou," o lana taumafaiga lea e fa'atepa le 'au kerisiano sa tosina atu i a'oa'oga sese i le vava lalata o le mafutaga sa latou i ai i le amataga – "...ua iloa i matou i o outou loto fuatia ifo" (f.11).

Finau le aposetolo, o le soifua fa'aleagaga o le 'au kerisiano i Korinoto – i latou sa tumau i lana tala'iga, atoa ai ma i latou sa tosina atu i a'oa'oga sese – o le molimau lea e fa'amaonia ai lona tulaga fa'a-aposetolo ma le tala lelei o loo fa'amamafa i lana galuega tala'i: *"Auā e le toe ta'uleleia matou e i matou ia te outou..."* O le soifua fa'aleagaga foi lea e tete'e atu ai le 'au kerisiano i a'oa'oga sese: *"...a ua matou avatu ia te outou se mea tou te mitamita ai ona o i matou, ina ia ia te outou se mea e fai atu ai i ē o mitamita i mea e vaaiā, a e le o le loto"* (f.12). O le 'au Iutaia-Kerisiano ma i latou o loo fa'amamafaina le tulafono, o latou ia o loo *"mitamita i mea e va'aia,"* poo mea *"fa'alelalo-lagi."* A o ē o loo tumau i a'oa'oga a le aposetolo, aemaise lona fa'amamafa i le fa'atuatua i le alofa tunoa o le Atua sa fa'aalia i le maliu ma le toetu o Keriso, o latou ia e mitamita i mea o i le "loto" – o le amataga moni lea o le fa'atuatua.

Sa fa'atāuina e le aposetolo le aoga o "meaalofa o le agaga" e fa'avae a'i le soifua fa'aleagaga o le 'au kerisiano. A e manatu le 'au Iutaia-Kerisiano, o ia meaalofa e valea ma lē aoga, pei o le 'tautala i gagana eseese,' auā e leai se isi e malamalama ai. Afai foi o fa'amamafa e le aposetolo ia mea alofa i lana tala'iga, manatu le 'au Iutaia-Kerisiano, e valea foi le aposetolo. Tali Paulo i le f.13, *"afai ua matou vālea, ona o le Atua lea;"* O lona uiga, o meaalofa o le agaga ua manatu le 'au Iutaia-Kerisiano e valea, e mai le Atua ia, ma, o i latou ua faifai i ia meaalofa, ua faifai foi i le Atua. Auā o meaalofa e mo le atiinaa'e o le ekalesia. A fa'apea ona fa'aaogaina ia meaalofa, o lona uiga, e 'atamai' lē e ana mea alofa. A o le 'atamai' e lē mafua ona o le tagata ua i ai mea alofa, ae mafua ona o le ekalesia o loo atiinaaeina e ala i ia

meaalofa: “*pe afai ua matou atamamai, ona o outou lea.*”

14 Auā ua pulunaunauina i matou i le alofa o Keriso; o loo manatu faapea i matou, na maliu le to’atasi mo tagata uma, o lea ua oti ai tagata uma; 15 na maliu foi o ia ona o tagata uma, ina ia le usiusitai pea o ē ola ia te i latou lava, a o ia o lē na maliu ma toe tu mai mo i latou.

Ta’utino le aposetolo, o lana tala’iga sa ‘pulunaunauina’ i le ‘alofa o Keriso’. O le upu eleni o loo fa’aliliuina i le upu Samoa ‘pulunaunauina’, e mafai foi ona faaliliu ‘o le faamalosi atu’, po o le ‘faamalosi’. O lona uiga, o loo ta’utino le aposetolo, e mafua lana tala’iga ona o le ‘alofa o Keriso’ o loo fa’amalosi ia te ia ma lana galuega tala’i. O le alofa lea na fa’aalia e Keriso i lona maliu: ‘*na maliu le to’atasi mo tagata uma, o lea ua oti ai tagata uma*’ (f.14). Manatu le aposetolo, e auā’i uma tagata kerisiano i le maliu o le Alii. Afai ua maliu Keriso mo tagata uma, e tatau foi ona ‘oti’ tagata uma; o le oti lea o tu’inauina o le tino, oti amioga fa’ale-lalolagi, oti le agasala, ma isi. A e ‘*na maliu foi o ia ona o tagata uma, ina ia le usiusitai pea o ē ola ia te i latou lava, a o ia o le na maliu ma toe tu mai mo i latou*’ (f.15). O i latou ua ‘aua’i fa’atasi ma Keriso i lona maliu, e ‘aua’i fa’atasi foi i lona manumalo mai le tu’ugamau. Manatu le aposetolo, o le maliu ma le toetu o le Alii o le amataga lea o le ola fou mo le tagata Kerisiano – le ola fou e fa’avae i le ola usiusitai ia Keriso.

16 O lenei, e amata i nei ona po ona matou le toe iloa se tasi i la le tino; e ui lava ina iloa e i matou o Keriso i la le tino, a o lenei, matou te le toe iloa. 17 O lenei, afai o ia Keriso se tasi, o le tagata fou ia; ua mavae le ola tuai, faauta, ua oo mai le ola fou!

O le ola fou lea e le toe manatu ai le tagata i mea fa’alelaga po’o mea fa’ale-lalolagi. Ta’utino le aposetolo, ‘*e ui lava ina iloa e i matou o Keriso i la le tino, a o lenei, matou te le toe iloa*’ (f.16). I le amataga o lana galuega tala’i, sa fa’ale-lalolagi le iloa o le aposetolo o Keriso – o le iloa e fa’avae i le tulafono. I lona soifua tuai sa i ai, sa avea Saulo ma falesaio o le lotu ao Iutaia – le tagata sa mulimuli i mata’itusi uma o le tulafono. O lona naunautai’iga mo le tulafono sa tofia ai o ia e ta’ita’i i le sauaina o le ‘au kerisiano. A o le ala i Tamaseko na fetaia’i ai ma le Keriso toetu, ma liliuina ai i le tala’iga kerisiano.

A o afuafua lana tala’iga, sa tauivi le aposetolo e fa’afeso’ota’i lona fa’atuatuga fou ia Keriso, ma ona lagona mo le tulafono sa soifua ai i lona olaga atoa. O le tauiviga lea o loo atagia i ana tusitusiga. A fa’asolo tusitusiga a le aposetolo i taimi sa tusia ai, e muamua le tusi i le ekalesia i Tesalonia; sosoo’o lea ma le tusi i le ekalesia i Filipi, le tusi ia Filemoni, le ekalesia i Kalatia, 1 & 2 Korinito, ma le tusi i le ‘au kerisiano i Roma. I lana tusi muamua lava na tusia (Tesalonia), e peisea’i o loo mamafa i lagona o le aposetolo le tāua o le tulafono. Peita’e, e o’o mai i le taimi sa tusi atu

ai i le ekalesia i Filipi, ua amata ona fesiligia e le aposetolo ona lagona mo le tulafono. E le o ta’ua ni ona lagona i lana tusi ia Filemoni. A e o’o mai i le taimi sa tusi atu ai i ekalesia i Kalatia ma Korinito, ua matua fa’alēaogina e le aposetolo le tulafono. I le amataga o lana galuega tala’i, sa fa’ale-lalolagi lona iloa o Keriso ona o lona manatu i le tulafono. A o lenei, i lona tusi atu ia Korinito, ua fa’alēaogaina le tulafono, ma ua le toe iloa Keriso ‘*i la le tino*’.

Le ‘ola fou’ e maua i le maliu ma le toetu o le Alii sa ta’ua i ff.14-15, ma le ‘iloa o Keriso’ i le f.16, lea ua ta-aofa’i e le aposetolo i le f.17: “*O lenei, afai o ia Keriso se tasi, o le tagata fou ia; ua mavae le ola tuai, faautua, ua o’o mai le ola fou.*” O le tagata ua ‘ia Keriso’, o le tagata lena ua ‘aua’i fa’atasi ma Keriso i lona maliu ma lona toetu, ua avea ai o ia ma ‘tagata fou’. A liliu mai le fa’a-eleni, e mafai foi ona faauigaina, o le ‘foafoaga fou’. Ua ‘mavae le ola tuai’ auā ua oti lona tagata tuai fa’atasi ma Keriso i lona maliu, a ua ‘o’o mai le ola fou’ – le tagata ua manumalo fa’atasi ma Keriso i lona toetu. Manatu le aposetolo, e le mafai ona pa’i le tagata i le ola fou ma avea ma ‘tagata fou’, pe a le oti muamua lona tagata tuai. E le mafai ona ‘o’o mai le ola fou’ pe a le muamua ona ‘mavae le ola tuai’. O le tulaga lea ua fa’atauaina ai e le aposetolo le auai o le ‘au kerisiano i le maliu o le Alii. Auā o le ala i lagona ai le matagofie o le pa’i mai ma le manumalo o le toetu, e ui atu muamua i le satauro; ia oti lou tagata tuai, faatoa mai ai le ola fou.

18 O mea uma foi mai le Atua ia, ua uma ona faaleleia e ia o i tatou ia te ia e ala ia Iesu Keriso, ua tuuina mai foi ia te i matou le galuega o le leleiga.

19 O lenei, sa ia Keriso le Atua, ua faaleleia e ia le lalolagi ia te ia, ua le ta’ua a latou agasala ia te i latou; ua ia tuuina mai foi ia te i matou le upu o le leleiga.

O le ola fou e maua i le maliu ma le toetu o Keriso, o le auala lea ua ta’uleleina ai i tatou i le Atua, e ala ia Iesu Keriso. Sa faia e le Alii le galuega o le leleiga (ministry of reconciliation) mo i tatou e ala i lona maliu ma lona toetu. E le gata ua tatou maua ai le ola fou ina ua tatou manumalo fa’atasi ma ia i lona toetu, a e ua ta’uleleina ai foi i tatou i luma o le Atua. Manatu le aposetolo, talu ai ua avea le ‘au kerisiano ma ‘foafoaga fou’ ona o le galuega o le leleiga sa faia e Keriso, ua tu’uina mai lenei galuega o le leleiga e faaauuina e tagata Kerisiano (f.18). O le tagata ua avea ma ‘foafoaga fou’, o ia lea ua tu’uina mai ai le galuega o le leleiga.

Sa ta’uleleia le lalolagi i le Atua ona o Keriso. A o le auala na fa’atino ai lenei leleiga, ‘*ua le ta’ua a latou agasala ia te i latou;*’ E i’u le agasala i le oti. A e na ‘*maliu le to’atasi mo tagata uma...na maliu foi o ia ona o tagata uma*’ (ff.14-15). Ua le toe ta’ua le agasala i le tagata, auā o le mea lea na maliu ai Keriso. O lona maliu ua fa’aleleina ai le lalolagi i le Atua. O le feau, po o le ‘upu o le leleiga’, lea ua tu’uina mai e tala’iina i ē ua avea ma ‘foafoaga fou’ – o ē ua oti o latou tagata tuai fa’atasi ma Keriso i lona maliu, ma manumalo i le ola fou fa’atasi ma Keriso i lona toetu.

20 O lenei, o sāvāli i matou a Keriso, peiseai ua aioi mai le Atua ia te outou e ala ia i matou; matou te ole atu, o sui i matou o Keriso, ia outou lelei ma le Atua. 21 Aua o lē na le iloa le agasala, na faia o ia e le Atua ma agasala, mo i tatou; ina ia aveia i tatou ma amiotonu a le Atua ia te ia.

O ē ua tu'uina mai ai le galeuga o le leleiga, o 'sāvāli a Keriso' i latou. Pei ona aveia Keriso ma sāvāli a le Atua, lea ua aveia nei le 'au kerisiano ma 'sāvāli a Keriso', mo le mafua'aga lava e tasi: ia fa'alelei le lalolagi i le Atua. A e 'ese'ese fa'amamafa o ia sāvāli. Fa'atino e Keriso le leleiga e ala i lona maliu ma lona toetu, auā 'o lē na le iloa le agasala, a e na faia o ia e le Atua ma agasala mo i tatou'. A o le 'au kerisiano, i latou ua maua le ola fou i le leleiga sa fa'atino e Keriso, o latou ia e tala'iina le leleiga lea na faia e Keriso, ina ia lelei ai tagata uma i le Atua.

Toe Upu

I le aafia ai o le lalolagi ma tagatalotu o le EFKAS i aafia o le koviti-19, ua tatau i le Ekalesia ona toe taga'i i lana ga-luega tala'i ma faiga masani o loo faaogaina e faatino ai, poo mafai ona faataunuu ai le misiona a le Atua ma lagona ai e tagatalotu le feau o le feau o le talalelei, i lenei vaitau o le koviti o loo ola ma soifua ai. Sa vaaia nisi o suiga fou i le galuega tala'i a le Ekalesia i le taimi na tapunia ai malu-malu apuai ma faasa alavaa mo femalagaaiga talu le koviti, ina ua faaogaina tekanalosi faanei ona po e faataunuu ai sauniga lotu i luga o le upega tafailagi, faapea le fonotele a le Ekalesia i le tausaga ua mavae. A o le fesili e tulai mai, "O lava lea?" "O i ai nisi suiga e tatau ona fai e le Ekalesia i lana galuega tala'i e mafai ai e le Ekalesia ona 'ola faatasi ma le koviti'?"

Sa fa'amamafa e Iesu le mana'omia o suiga fou i faiga masani sa sau a'i le lotu o Iutaia ma lana galuega tala'i. O faiga ua silia ma le 400 tausaga o fa'aaogaina e le lotu a Iutaia e tala'i ai le finagalo o le Atua i tagata. E o'o mai i le vaitaimi o Iesu, ua leva ona le toe talafeagai ma le tulaga sa ola ma soifua ai tagata, ina ua aveia ma aveia mamafa i tagata le tausaga o le tulafono, aemaise o lavelave eseese sa faapoopo i ai e ta'ita'i o le lotu. Sa naunau foi le aposetolo i le 'au kerisiano i Korinito e manatunatu i le ola fou ua latou maua ona o le maliu ma le toetu o Keriso. Auā o le tagata ua "ia Keriso, o le tagata fou ia; ua mavae le ola tuai, fa'auta, ua o'o mai le ola fou!" Le ola fou lea sa fanau mai ai le Eka-lesia ma lana tala'iga. O le ola e "fou" auā o le ola e fa'asino i le manumalo o le Alii i le oti ma le tuugamau e ala i lona toetu. O le ola fou lea e tatau ona tausisi ai pea le Eka-lesia i le faatinoga o le misiona a le Atua ma le tala'iina o le talalelei. Auā e fou pea le fa'aali mai o le Atua i ona tagata, i le mea o loo ola ma soifua ai. E tatau foi ona fou auala ma faiga e fa'aaoga e le Ekalesia i lana galuega tala'i, ina ia malamalama ai tagata i le finagalo alofa o le Atua mo i latou. Ina ia atagia leni ola fou i le Ekalesia ma lana galuega tala'i, o la le Aposetolo, ia mavae muamua le "ola tuai." Soifua.

RIPOTI O LE LUCKY NUMBER: KOMITI O ATINA'E EFKAS

E faia leni ripoti i le ava tele ma le faaaloalo, e faailoa atu ai i le mamalu o le Ekalesia Aoa le tulaga ua oo i ai le tapenaga a lau Komiti o Atina'e, e tusa ai ma le faamoemoe o le Lucky Number sa pasia i le fonotele 2021. Ua mae'a ona tau aoina pepa a 'aulotu ta'itasi, o Pulega, ma Mafutaga Lagolago, ma o lea ua amata nei ona faamaopoopoina. Mo nisi o faasilasilaga i leni faamoemoe, silasila i luga o le itulau a le Ekalesia i le upega tafailagi, o loo faailoa atu ai tulaga uma ia: <https://efkasonline.org>. Ae mo le silafia o le Ekalesia Aoa, o 'aulotu ma pulega ia ua mafai ona faao mai le tau o latou pepa i le Komiti i le taimi na lolomia ai leni Lamepa:

1. SCCC (Carson) - \$4,500.00 (30)
2. MOAT (Hawaii) - \$4,500.00 (30)
3. Daly City - \$5,100.00 (30+4 pulega=34)
4. San Francisco - \$5,100.00 (30+4 pulega=34)
5. Masefau - \$4,500.00 (30)
6. Afono - \$4,500.00 (30)
7. Ta'ū - \$4,500.00 (30)
8. Utumea - \$4,500.00 (30)
9. Pulega Saole - \$3,000.00 (20)
10. Amaluia - \$4,500.00 (30)

Mo 'aulotu ma pulega i fafo ua uma ona lafo mai le tau o latou pepa ae le o ta'ua i le lisi e pei ona avatu i luga, masalo toetiiti taunuu mai i le meli, ona ua fai lava si tuai ona taunuu mai le meli i Amerika Samoa ona o aafia o le koviti. Ae silasila i le Lamepa o Me-Iuni 2022 o lumanai nei, o le a toe avatu ai foi leni lisi ma tau o pepa o le a taunuu mai. E toe faamanatu atu, o le aso 16 o Iulai e faatino ai le se'i. O le a mafai ona maimoa mai ai outou i fafo i luga o le upega tafailagi. Ae mo tatou iinei i Amerika Samoa, sei mautu le nofoaga e faatino ai le se'i, ona faailoa atu lea.

Mo 'aulotu ma pulega i fafo o loo tuufesili pea pe faapefa ona faao mai le tau o a outou pepa i le Ofisa Tutotonu ma le Komiti o Atina'e, e mafai ona lafo faa-siaki mai i le meli, pe lafo mai faa-uaea. Silasila i le itulau a le Ekalesia i luga o le upega tafailagi, o loo faailoa atu ai tulaga uma ia. Ae mo 'aulotu ma ona faaAmerika Samoa e fia faao mai le tau o outou pepa, ia susu ane i le Ofisa o le Failautusi Aoa, pe vaai ane le fale 'ie a le Komiti o Atina'e o le a faatu totonu o le 'aai o Kanana Fou, e mafai ona totogi ai. E maua ai foi ma pepa faasili i lalo o le fale 'ie, mo outou e manaomia nisi pepa.

Vaai ne'i misi lou avanoa e te laki ai. E sefulu pepa o le a se'i i le aso lea, e lelei mo le ta'i \$10,000.00 i le pepa. E leiloa lava le fiki o se pepa se tasi, pe lua, pe tolu foi—o le mea ua ala ai ona ta'ua lea taaloga, o le Lucky Number. Ia manuia ma laki pepa ua outou faatauina. Soifua,

Lau Komiti o Atina'e, EFKAS

Lisi o le 'Aufaigaluega Agavaa mo le Galuega Tausi 'Aulotu

O le lisi leni o le 'aufaigaluega i Faifeau ma A'oa'o Kanana Fou o loo avanoa ma agavaa mo le galuega tausī 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo tau sailia ni o latou feagaiga. O suafa ia, e le gata o le 'aufaigaluega o loo galulue nei mo le Ekalesia Aoa o Kanana Fou ma le Ofisa Tutotonu, a o i latou foi o loo galulue fa'amaoni i tua i 'aulotu ma Pulega, e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i leni lisi, ia fa'afesootai mai le Ofisa a le Failautusi Aoa o le imeli: gensec@efkasonline.org, e fa'alauloia ai lou suafa i le taimi e toe lolomia ai le Lamepa.

Seminare Faafaifeau i Kanana Fou:

*Dr. Moreli Niuatua FF, *Peresetene*
 *Dr. Simi Mauga FF, *Sui Peresetene*
 *Dr. Fepuari Logoleo FF
 *Sasa Satoa FS
 (* e fa'amaonia e le 'Au Toeaina)

Ofisa o le Failautusi

Fuli Taveuveu AKF

Ofisa o A'oa'oga Kerisiano:

Setefano P. Lefale FS, Fa'atonu
 Soosoo Tuiolomotu FS
 Segā Ifopo FS
 Vili Polikapo FS

Lamepa:

Edward Semaia FS, Faatonu
 Vagana K. Saili AKF

A'oga Maualuga i Kanana Fou:

Frank Ah Ken AKF

Pulega Fale-Ta'u:

Ioane Ioane FS (Fitiuta)

Pulega Itu'au

Tavita Mailoto FS (Ma'ama'a)
 Meke Matautia AKF (Nuuuli)
 Al Luavasa Tunupopo AKF (Fagasa)

Pulega Sa'ole:

Setefano P. Lefale FS (Auasi)
 Vili Polikapo FS (Amouli)
 Edward Semaia FS (Aunuu)
 Siavao Iese FS (Alofau)

Pulega Tualatai:

Segā Ifopo FS (Vailoatai)
 Uaea Satele FS (Vailoatai)
 Daru Ulutu FS (Malaeloā)
 Sinaka Ulutu FS (Malaeloā)

Pulega Alataua:

Rossetti Faamausili FS (Nua Seetaga)
 Tasele Tuigamala FS (Leone)
 Soosoo Tuiolomotu FS (Poloa)
 Fetuao Mua FS (Leone)

Pulega Tualauta:

Kirifi Muao FS (Pavaiai)
 Taafua Taafua FS (Iliili)
 Vagana K. Saili AKF (Aasu)

Pulega Sua:

Ioane Peleti FS (Fagaitua)
 Simeona Ape AKF (Laulii)

Pulega San Francisco:

Moegagogo Tamasese FS
 Sene Ioelu FS (Daly City)
 Eliu Eseroma FS (Daly City)
 Ketesemane V. Tagaloa FS (Sacramento)
 Safue Ulufalelupe AKF (Sacramento)

Pulega Santa Clara:

Vai Malaulu FS (Tafatolu)

Pulega LA Saute:

Samuelu Tialavea FS (FOLA)

Pulega Alaska i Matu:

Vaimoso Pasia FS (Lupe Faolataga)
 Faalefu Savusa FS (Faavae Fou)

Pulega Alaska i Saute:

Troy Foilefutu AKF (Feagaiga Fou)
 Tomasi Foilefutu AKF (Feagaiga Fou)

Pulega Ausetalia:

Oto Tumanu FS (Alofisa o le Atua)

Lisi o 'Aulotu Avanoa

O nisi ia o 'aulotu o le EFKAS ua avanoa i le taimi na lolomi ai leni Lamepa,
 o le a ogā ai leni lisi e saili ai so latou faifeau:

- EFKAS Fagasa
- EFKAS Kanana Fou, Sydney
- EFKAS Maamaa
- EFKAS Ft. Hood, Killeen